

四庫全書

子部

欽定四庫全書

居易錄卷十九

刑部尚書王士禎撰

梧溪集記宋元末國事人才多史家所未備予讀之信然又如宋高皇壽成殿汝蕘解引孟郡王忠厚佩印歌制置彭大雅瑪瑙酒椀歌之類尤令觀者一唱三歎予最愛其題王冕墨梅一絕云霜落銀河月在天美人松下鬪嬋娟一枝倒影吳牛角曾似知章踏酒船自序云冕者畫梅常羈牛遊京

城名貴側目

兵部員外郎裴奏新安人假歸將行以其邑訓儀封王

世治所刻吳江計甫草

東讀予論詩絕句記來徵士大

夫詩歌紀事以計此記為予詩作也因先呈予世治跋

云不肖生也晚距先肅敏公六世時已百餘年守家藏

集恒虞失墜有莫為之後之懼康熙壬戌七月太邱王

瑗郵致甫草計先生讀阮亭詩記一篇世治讀之不禁涕

淚深歎知己之難而相遇之奇也世治半世俯首老諸生

不能與當代賢士大夫挈長比藝焜耀先澤而甫草乃  
從阮亭王公少谷山人之句而致其感動痛哭之辭至欲  
為先肅敏死斯亦奇矣嗟乎是少谷阮亭兩公之知先  
肅敏而總藉傳於計先生之一痛也海內文人其誰不  
願為計先生死者哉予康熙癸卯在揚州一日雨行如  
臯道上得論詩絕句四十首蓋倣元裕之作其一云三  
代而還盡好名文人從古善相輕君看少谷山人死獨  
有平生王子衡甫草丁未於都門見此詩因作記今載

甫里集表字盧院康熙甲辰進士以溧陽知縣行取循吏之聲甚著為督捕司屬予擬薦之未果

席帽山人集載台州余季女寄夫詩五章云妾誰怨兮  
薄命一氣孔神兮化生若甌春山媚兮秋水淨秉貞潔  
兮妾之性一夜夢兮食梨靈氛兮為予占之曰行道兮  
遲遲斂角枕兮槩如風動幃兮心悲二雲黯黯兮雪飛  
棘夫子介兮如石苦復留兮不得望平原兮太息涕泗  
橫兮霑臆三送子去兮春樹青望子來兮秋樹零樹有

枝兮枝有英我胡為兮  
熒熒四織女兮牛郎豈謂化兮  
為參商欲徑渡兮河無梁  
霜露侵襲兮病偃在牀嗟  
嗟夫子兮誰與縫裳  
五右詞旨悽婉音族古雅不減徐淑  
誰謂宋元以下無樂府耶得之女子尤奇

睢州湯尚書荆峴斌醇儒也仕至開府九列而家甚清  
貧居京師妻巷陋室冬禦寒一羊裘外無長物尚書歿  
後有僕劉振者鬻身旗下一日赴部告提妻子云在睢  
州生員湯溥家司具稿呈堂欲為行提予不可曰彼自

言因債負典身湯氏年滿復鬻身旗下烏知非賣身於湯而背主投旗者乎行提則墮此輩計中既索妻子又將索衣物索路費不滿其谿壑不止且背主投旗自有應坐之律主僕名分地方風俗關係甚鉅豈可自此一事開其端耶遂諭司改稿遞發劉振令河南巡撫嚴行質審有無背主投旗情節閭中丞興邦審擬得情照例治振罪仍斷與湯氏為奴而開歸諸郡背主覬覦者懼矣溥者尚書子也

新城民牛德者鬻身及妻女於旗下逃歸十餘年矣一旦為有司獲解自供子女幾人有司復查解到部而長女次女皆已適人有司來請明示按條例長女係旗下所生帶逃應提解次女係逃後民間所生應追身銀四十兩解部給主予以提解則夫婦離異方難之其旗主李文士者忽具呈自言不忍其女夫婦斷離人與身銀俱不願領祈行知地方官各令寧家永無改悔予驚歎曰世乃有如此人乎陰德大矣其後必昌亟面加獎勵准



行而二女皆安室家矣丈夫士之義不可使湮沒無傳也  
特表而出之

安邱張杞園

貞

以明經需次翰林孔目博雅好古工篆

刻喜交遊青州名士也以寫本宋岳珂肅之玉楮集相  
寄集八卷有嘉熙庚子自序肅之鄂忠武王孫霖子官  
戶部侍郎著書甚多如金陀粹編程史愧郗錄皆傳於  
世又有東隱事畧未及見此集乃衡府高唐王家鈔本  
流傳絕少高唐王諱某號岱翁工篆隸癖嗜古書寫錄

多祕本鼎革後散落市肆紙墨精好裝潢工緻康熙乙巳予歸自揚州一日至青州與杞園觀書市中得劉貢父春秋權衡意林二書亦高唐府中物杞園云曾見岱翁篆書入藥鏡一篇淳整茂密亦希有也

戶部郎中王埏以其遠祖孝行錄索題孝子名原文安人父珣以逃里役去鄉里原方在襁褓稍長有室段氏日問母張兒父安在母告以故原哀痛跪母前欲遠遊覓其父母止不聽乃去之齊魯數年至田橫島宿神祠夜

夢入古刹日當午見僧方炊就乞食僧與之一盂曰此  
莎米飯也味苦為汝和以肉羹既覺有一丈人攜杖入  
原告之夢丈人曰日當午南方也莎草根附子也和以  
肉羹附子膾也急去當於山寺求之原謝而行抵輝縣  
入帶山夢覺寺會大雪宿山門下僧見而叩所從來具  
以對是時珣在寺為僧都養僧引原示之曰此少年亦  
父安人試作鄉語於是父子語合抱持大哭聚觀者皆  
感動泣下住持僧法林者贈詩云豐干豈是好饒舌我

佛如來非偶爾昔日曾聞呂尚之明時又見王君子偕  
留衣鉢種前緣但笑懶牛鞭不起歸家日誦法華經苦  
惱衆生今有此原遂奉珣以歸年六十有四矣又二十  
年始卒原卒時亦八十有四子六人孫十五人曾孫二  
十二人應霖應期皆進士李本寧維禎李卓吾贄皆為  
之傳其大畧如此六世孫景祚

本名胤祚  
後改今名

字迂叟順治

丙戌進士官大理卿挺即廷尉子也

門人太原閻詠字復申其父若璩字百詩邃於經術博

雅好古詠寄予書云此間有一僖父自謂精通小學問  
詠今代詩人誰為第一詠以吾師新城公對渠云吾家  
少陵詩賓客減應劉應為入姓常讀作平聲何新城公  
作仄聲用詠不能對歸質家尊家尊云皆可用也此字  
正為左傳國語應為武王之子所封之國陸氏宋氏無  
音故黃公紹韻會於蒸部應字曰入姓陰時夫韻府於  
徑部應字曰入姓非平仄兩用之證乎亦猶吾鄉之枚  
乘漢書無音故子美作仄聲枚乘文章古是也太白又

作平聲八月枚乘筆是也安得是李而非杜是杜而非  
李乎伍子胥之員讀作運亦讀作云故陸魯望詩賴得  
伍員騷思少未聞以令公四俊之謠而病其不識字也  
新城公博極羣書作詩字字有根據豈容輕議議之者  
所謂蚍蜉撼大樹耳徐自笑曰吾作新城公桓譚得否  
百詩博聞強記漢唐注疏皆能舉其詞此其緒餘耳然予  
詩用應劉只作平聲彼云作仄用者不知其何據也

從來辨夏正周正者幾成聚訟百詩近著博湖掌錄有

改歲改時改月解一篇最博而核聊記於此云事有為  
當代所通尚習聞習見隨人舉及言下輒知此屬某彼  
屬某不復煩疏解者三正之通於民俗亦其一也予嘗  
以豳風七月詩言月夏正也言曰周正也周禮太宰小  
宰正月建子也正歲建寅也一篇一官之中已交錯言  
之然猶曰字有不同也若何以卒歲夏正之歲也曰為  
改歲周正之歲也月令季秋曰來歲秦正之歲也季冬  
曰來歲夏正之歲也十月蟋蟀入我牀下夏正之十月

也十月之交朔日辛卯周正之十月也臨卦至於八月有凶夏之八月也玉藻至於八月不雨周之八月也月令孟春乘鸞路夏之孟春也明堂位孟春乘大路周之孟春也臣工詩維莫之春周之暮春也論語暮春者夏之暮春也明堂位季夏六月改時與改月也左傳襄十四年正月孟春不改月與時也君牙夏暑雨冬祁寒不改時即不改氣者也雜記正月日至七月日至改月却不改節者也左傳昭十七年當夏四月建巳也於商為四



月建辰也武成惟四月顧命惟四月建卯也郊特牲歲十二月孟子歲十二月建亥也伊訓十有二月三統厯商十二月建子也夏小正十有二月凌人十二月建丑也四代之制連類錯舉昭昭別異然猶曰書有不同也若曾子一人口中病於夏畦夏夏之夏也秋陽以暴之秋周之秋也趙岐註周之秋夏之五六月盛陽也郝仲興曰周以五六月為秋陽光燥烈金遇火伏暴之極乾也夫以暴物極乾言有不須午未月之陽者乎同一絳

縣人之生正月甲子朔在晉為七十三年在魯則七十  
四年也同一史蘓之占六年逃明年死在晉則合在魯  
中隔一年也所以者何用夏正與周正之不同不惟此  
也昭元年正月趙武相晉國初午曰於今七年及至秋  
醫和曰於今八年所以者何昭元年正月仍晉平公十  
六年十一月昭元年秋則晉平公十七年之夏或秋也  
以至三統歷殷十一月戊子後三日得周正月辛卯朔  
周正月殷十二月洛誥傳以十二月戊辰晦到明月為

夏之仲冬夏仲冬周孟春漢古詩明月皎夜光一篇玉衡指孟冬漢以十月為歲首此孟冬乃建申之月指改時而言下文秋蟬鳴樹間為明實候故以不改者言唐儲光羲詩夏王紀冬令殷人乃正月則又和盤托出楊升菴曰唐人不辯而自了然也是也惟宋儒始生異說明人出而益滋妄解矣

近所聞見異姓再筆於此漢有屋豫宋有悖實姑蘇志科第表宋有侍其璋崇大年順德府志職官表有塵洪

堂昭賞璫科第表有橄大經只好仁尼登紅慶烈女要  
氏長葛志有義敬聰芳東陽志有點烏新城志有彪準  
章邱志有部文華及恩朮管訾鬲龔類德繩邵勾絮善  
能盈匿付太俎吳乙禡隆鑒書等姓癸未齒錄蘭完瑄  
妻叱氏丙戌題名錄青伯昌洛陽人近科齒錄有香氏  
戰氏三仕一得云臨淄有泊姓宣城有後姓平陽府有  
棕姓癸酉吏部選人有力姓直隸巡撫爰書有耳姓南皮  
婦人氏氏山東巡撫爰書有帖姓牙姓稅姓督捕文案有

嵩氏戶部文案有芟氏芟氏上姓讓姓野姓細姓鎮姓行姓  
改姓穰姓冬姓賣姓買姓擺姓麗姓念姓容姓瓢姓馮具  
區集有職姓彭少宰僕黃姓勞書升通政云督學山東時  
諸生有酒姓字姓賢姓又戶部文案有縱姓蹤姓布姓腰  
姓倉姓朋姓資姓穰姓伯姓拜姓茂姓延綏鎮志有守備  
赴北鑰希勝蛟又汝州志有壘大器怯迅然魯山志有長  
可舉斐興廣撫疏有閉聚秀彭少宰羨門云宏治間進士  
有不負恩陝西有荔姓當是荔非之後圖繪寶鑑有跋異

汧陽人又交河人雪案入寧夏衛守備變化元

趙叔向肯綮錄列于九方臯善相馬九姓方臯名

本朝會試自順治丙戌至康熙辛未已歷十八科

中增二科

其登內閣九卿督撫三品者惟丙戌乙未二科最盛丙

戌大拜四人傅聊城以漸李文勤霽魏栢鄉喬介馮文

毅溥尚書八人沙宗伯澄高司寇景傅司空維鱗冀司

空如錫朱司空之弼父司寇元徵魏敏果象樞劉端敏

捷督撫尚書三人袁清獻懋功朱河督之錫林漕督起

龍左都御史一人劉遷安鴻儒侍郎十五人李宗伯爽  
棠石司農申張司寇爾素陳司農協王司空天眷胡少  
宰兆龍梁少宰清寬梁少宰清遠田司農六善楊司馬  
時薦子司寇嗣登朱司農裴李司馬棠馥楊司空運昌  
王司農度左副都御史一人董洛陽篤行巡撫右副都  
御史一人張閩撫汧通政使二人晉洪洞淑軾劉羅山  
士蘭大理卿一人王文安景祚本名景祚內院學士一人夏蓋  
州數九

乙未大拜一人宋文恪德宜尚書三人王司農日藻王司  
農隲陳文安鼐永侍郎十二人史宗伯大成田宗伯種玉  
王宗伯澤宏胡少宰簡敬于司農可托嚴司農沆王司農  
遵訓暨不佞士禎孫司馬光祀楊司馬雍正李司馬贊元  
梁司空鉉左副都御史一人徐武進元珙總督侍郎二人  
徐清獻旭齡慕漕督天顏巡撫侍郎三人田浙撫逢吉劉  
東撫芳躅曹貴撫中吉巡撫副都御史二人劉直撫祚  
遠伊雲撫闢內閣學士一人綦高密汝楫通政使一人



楊臨清鴈太常卿一人洪南安士銘太僕卿一人蔣丹  
徒寅國子監祭酒一人馮涿州源濟蓋丙戌龍飛首科  
即乙未極盛不能及也後王宗伯澤宏與予亦至尚書  
六月十六日滿洲內閣部院赴

暢春苑啓奏

御賜大學士伊桑阿阿蘭泰吏部尚書庫勒納各

御書扇一庫勒納公得素扇詩云亂陰堆裏結茅廬已  
共紅塵跡漸疎莫問野人生計少牕前流水枕前書末書錄

唐山中前有小壘文曰漱芳後有小壘文曰含英咀華  
王太史肯堂字泰金壇人恭簡公樵之子初太夫人與  
恭簡各處者已十年一日大風雨公留宿已而遂娠太  
夫人惡之兩取墮胎丸墮之不下將再市藥肆中人夢  
神告曰若更予墮胎丸災必及汝詰旦市藥乃不敢予  
及太史生兩丸在兩握中宛然所著證治準繩律例考  
筆塵諸書皆盛傳於世

予於唐文最喜杜牧牧之孫樵可之以為在翱湜之右

樊川集家有舊刻本可之集止見毛本壬申六月偶過  
慈仁寺得金陵舊刻有謝兆申跋云是集得之南昌宗  
侯慎學攜之南北數歲矣頃與王相如校刻以傳同好  
萬厯四十一年癸丑有王文恪鰲序云是內閣祕本手  
鈔以歸者王名若

十八日九卿集議運大同米十萬石往西安府自大同  
陸運六百三十里至裴家川口及湖灘入舟先是命郎  
中常住等往船塢造船至是戶部議陸運車價疏上事

下九卿會議

特旨起外轉御史李時謙為陝西督糧道叅議仍令作速赴任

副將王國憲嘗為臺灣叅將言其地無橘柚荔支龍眼之屬如北地蒲桃蘋婆桃杏梨李之類皆無之有果曰番蒜五月熟大如蘋婆味甘香多津液樹大而葉圓又有果曰黃來去藤八月熟長可尺許味尤甘香其樹類蕉實生節間多芳竹如粵中多猿多野牛無虎豹

臺灣多番民呼中國人曰唐人亦如荷蘭暹羅之謂唐人也婚嫁不以媒妁男女相悅以檳榔相授受然後歸告父母女子塗髮及面臂皆以鹿油男女皆跣足市肆猶用永樂錢云臺灣府無城別有城在其西南曰紅毛城鄭氏僭竊時宮殿在焉今設叅將一員統兵三千駐之距臺灣二十里

臺灣多野牛千百為羣欲取之先置木城四面一面為門驅之急則皆入人即扃閉而饑餓之然後徐施羈勒

麋之麋豆與家牛無異矣

賜大學士伊桑阿洋扇一

御筆楷書唐人朱慶餘詩云林居向晚饒清景惜去非  
關戀酒杯石淨每因杉露滴地偏漸覺水禽來藥蔬秋  
後供僧盡竹杖吟中望月迴紅葉閒飄籬落迴行人遠  
見草堂開前亦用漱芳小璽後二小璽文曰正心誠意  
賜大學士阿蘭泰素扇一

御筆楷書唐人方干詩云東南雲路落斜行入樹穿村見

赤城遠近常時皆藥氣高低無處不泉聲映巖日向牀頭  
沒濕燭雲從柱底生更有仙花與靈鳥恐君多半未知名  
吾邑耿太淑人徐氏長山人巡撫僉都御史以貞孫長治  
知縣繼志女陝西叅議耿公鳴世之配巡撫浙江僉都  
御史庭栢之母也幼讀書工詩偶記數篇於此寄予中  
丞云家內平安報爾知田園歲入有餘資絲毫不用南  
中物好做清官答聖時輓王烈婦畢端人先叔祖  
檢討配云烈矣  
王門婦賢聲著帝京貞心同玉潔素質宛冰清取義邱

山重捐生一羽輕恩承明主詔千載播芳名偶成云時  
近清明二月天嬌花粉竹正鮮妍秋千架上人如玉溪  
水堤邊柳似烟紫燕飛飛歸畫棟白鷗點點浴晴川年來  
景物還依舊不見人生再少年其篇什最多壬午亂後  
盡散佚矣

予舊為潛江門人朱載震悔人題小竹山人王叔楚畫  
竹卷云茅齋青壁幾年成谿路無人畧約橫一夜春雷  
動崖谷四山風雨箨龍驚爾時但愛其畫之瀟灑亦不



詳叔楚誰何也讀徐宗伯叔明海隅集有王山人墓銘  
乃知為吳嘉定之羅溪人名翹字時羽一字叔楚幼嬉  
戲圖繪兼解唐人韻語已棄諸生為山人詩宗孟郊山  
水宗米芾間出新意尤工草蟲與竹不甚靳惜其技有  
求輒應之酒酣濡筆無不滿意去人以其易購無致重  
賄者即有得旋散斥之性骯髒不喜姘阿貴勢人以故  
名不出閭閻比老性益下急有召而饗之饗者已布豆  
而主弗見也山人怒罵曰而將尸予耶覆豆而出隆慶

壬申年六十八卒婁堅子柔叙其先友亦有叔楚名

錢氏貶空同滄溟二李先生至矣吳人之師友二李者  
如徐迪功黃五嶽以及弇州皆絕之於吳且夷迪功於  
大壁唐寅之列比之明妃遠嫁一日閱馮時可元成集  
辯徐太室二羅集序云吳詩清淺而靡弱不以二李薊  
之而何以詩哉元成吳人也其言如此天下後世其又  
可欺乎錢氏稱文徵仲詩近同年汪鈍翁注歸熙甫詩  
人之嗜好實有不可解者

按此條乃斤諫益以偏見論詩欺世故存之以著其妄

渾脫之義予向詳之皇華紀聞閱李中麓

先開

太僕塞上

曲一首云黃河萬里障邊隅點鹵年來謀計殊不用輕  
帆并短棹渾脫飛渡只須臾與朱秉器中丞河上楮談  
所記畧同李自注云脫音駝然後知渾脫舞渾脫帽皆  
當作平聲也

戶部尚書王隲工部尚書沙木哈自陝西賑濟回京奏  
賑過饑民三十萬共支過銀二十二萬兩有奇

上命內閣出問九卿以宋富弼知青州活饑民至五十萬

今朝廷殫力賑救止活得三十萬人其故何也對以史  
舉成數而言今則冊報實有此數耳

以太僕寺卿嚴曾渠為通政使司通政使

通政使羅秉倫以艱歸

七月二十八日九卿百官送

駕於神武門外是日

駐驛昌平州溫泉

八月初五日調補兵部督捕右侍郎王士禎為戶部右

侍郎

戶部右侍郎徐誥  
武以疾卒於位

欽天監疏請頒時憲厯於蒙古諸國仍載諸國名於厯  
首事下部覆准行

以內閣學士兼禮部侍郎王國昌為兵部督捕右侍郎  
以太常寺少卿李應薦為內閣學士兼禮部侍郎李前

左春坊掌坊庶子也

是時漢人內閣學士凡四人

起前工部尚書翁叔元為刑部尚書

刑部尚書陳廷敬以外艱歸

詔傳今年秋決其矜疑者仍今具題減等發落

九月十三日百官迎

駕於東華門

九月二十一日未時

經筵經筵講官滿禮部尚書顧八代兵部尚書索諾和  
禮部左侍郎兼太常寺卿席爾達右侍郎多奇漢吏部  
尚書李天馥禮部尚書熊賜履兵部尚書杜臻工部尚  
書李振裕吏部右侍郎兼翰林學士彭孫遘戶部右侍  
郎王士禎翰林院掌院學士兼禮部侍郎張英侍內閣

九卿

起居注給事中御史侍班兵書索諾和杜臻講天地之道可一言而盡也一節禮侍席爾達學士張英講尚書洪範貌曰恭五句講畢

賜宴太和門

十月初四日未刻戶部右侍郎王士禎接出

上諭諭戶部陝西西安等處地方連歲凶荒繼以瘟疫因而閭閻失業漸致流移朕軫視民艱焦勞宵旰自去歲冬月以來頻發帑金蠲免正賦輓運積穀轉運漕糧

屢次特遣大臣察勘多方賑濟念國家所重惟在養民  
目今秦省雖薄有秋收但民間匱乏已極倘非格外加  
恩無以使積困盡甦轉徙盡復陝撫所屬府州衛所康  
熙三十二年地丁銀米著通行免徵從前所有積欠未  
完錢糧亦著通行蠲豁務俾比屋同沾實惠小民咸慶  
更生用稱朕子愛元元撫育安全至意爾部即遵諭行

特諭

初五日



駕謁

孝陵內閣九卿跪送於東華門是日以吏部尚書李天馥為武英殿大學士兼吏部尚書

十五日

駕入內閣九卿跪迎於東華門

以禮部尚書熊賜履為吏部尚書以翰林院掌院學士兼禮部侍郎張英為禮部尚書

前禮書也

仍兼掌翰林院詹

事府事又兼

起居注日講乃特典也

工部左侍郎年遐齡改兵部兼都察院右副都御史巡撫湖北以左副都御史徐潮為工部右侍郎以通政使司通政使嚴曾渠為都察院左副都御史僉都御史宮夢仁為通政使左通政劉超凡為左僉都御史

命內閣大學士張玉書刑部尚書圖納視高堰堤工吏部尚書熊賜履往鳳淮揚三府徐州會同督撫清查開河築堤建造閘壩栽柳田畝應豁錢糧并兩河歸故中

河告成後淤成熟地應陞科田畝允總河尚書靳輔請也

以原任吏部右侍郎王封濬為禮部右侍郎

禮部左侍郎王賜昌

以病予

告尋卒

總督川陝尚書佛倫上籌秦十疏其第七疏言湖廣襄陽府有自襄江進小江口通陝西商州龍駒寨水路一道自襄陽府至小江口二百四十里襄江大船載運每船可八九十石至百石自小江口換小船至河南浙川縣

荆子關二百餘里每船可四五十石又於浙川縣換小船至陝西商南縣徐家店二百餘里河狹灘多每船可載七八石自徐家店至商州龍駒寨二百里此段水路多灘險每船可載五六石至龍駒寨已上不通舟楫龍駒寨至西安府相距四百餘里中間有秦嶺藍關七盤等則係嶺路有百里許臣惟小江口至龍駒寨雖係山河亦古來轉運河道但近代久不行運恐河道間有淤廢若此運道果能廣運楚米至龍駒寨積貯較之陸路

輓運殊為便易龍駒寨至省城不遠所積糧米自可隨時調度以備不虞奉

旨命內閣學士德珠往會同查勘

內閣奉

旨問九卿詹事科道等故總河尚書靳輔居官如何對  
任事年久諳練河務

賜謚文襄

內閣傳奉

上諭諭戶部廣東竈丁竈地等項康熙二十二年額外  
加增銀一萬四千二百四十六兩零此項加增銀兩自  
今年起着免一半

禮部尚書張公敦復

英

言懷寧劉方伯尚志隆慶辛未

進士也年六十有三子皆成立一日諸子置酒上壽方  
伯忽顧夫人慨然曰吾雖有子三人然無足繼書香者  
奈何夫人曰相公年未為老且精力猶健何不置姬妾  
數人廣繼嗣乎方伯笑領之夫人遂為置筵方伯六十

後復生九子一女若宰中崇禎戊辰進士狀元及第仕  
至春坊諭德若宜丁丑進士官兵部職方員方郎若宰  
孫輝祖康熙庚午解元

改都察院左都御史于成龍為兵部尚書總督河道

總河

斬輔以總督漕運兵部右侍郎董訥為左都御史

病卒

康修撰對山作武功志文古事核厥後秦中士大夫撰  
郡邑志率矜式之故陝西諸志多可觀戶部主事葉晟  
以郿縣知縣入為郎遺嘉靖中劉御史九經字豫吾所

撰都志凡八卷訓詞爾雅有對山之風武功志列璿璣

迴文詩圖都志列武侯八陣圖流馬法尤可玩

劉萬歷士辰進士

唐權文公德輿集五十卷

詩賦十卷文四十卷碑銘八卷議論二卷記二卷集序三

卷贈送序四卷策問一卷書二卷疏表狀五卷祭文三卷

集賢殿大學士楊嗣復為

序序云別有制集五十卷湖南觀察使楊憑為序今不

在編次之內此集故友潁川劉考功公馘

體仁

得之梁谿

顧孝廉修遠宸家考功之子凡字元歎寫以見寄者凡

丙辰進士今知河南孟縣



竟陵胡襄手寫其父石莊先生讀書說四卷繹志十九  
卷相寄屬序其書亦申鑒中論論衡之流也石莊名承  
諾明孝廉博雅工詩尤長於五言古選襄太學生亦能  
詩有寄予八詩極佳予編感舊集取石莊五言頗多襄  
詩云未假新文充祕玩先將詩格入編題謂此也

歐陽永叔致仕乞居潁終其身不歸廬陵前人議者不  
一洪文敏二筆駁之尤詳畧云歐公吉人其父崇公葬  
於其里之瀧岡公自為阡表而公中年乃欲居潁其思

賴詩序云云逍遙於賴蓋無幾時惜無一語及松楸之  
思崇公惟一子公生四子皆為賴人龍岡之上遂無復  
有子孫臨之是因一代貴顯而墳墓乃隔為他壤予每  
讀之輒為太息嗟乎此文不可作也此言雖起永叔於  
九原不知何以自解於不孝之罪

上幸紅螺山遣內大臣明珠賁

御酒祭奠故大學士謚文肅范文程及其子福建總督  
謚忠貞范承謨

東武瑯邪臺上每晴明輒望見海外山林城郭髣髴有  
人物車馬往來馳驟之狀不知其何地也然月僅一二  
亦不恒見又城東廬山廬教隱處有地市常有士人數  
輩飲山巔條見對面復有一峯形狀與廬山無二方共  
訝之頃之幻滅乃知其地也李侍讀漁村云


二月初八日巳刻

御文華殿經筵經筵講官滿吏部尚書庫勒納禮部尚書  
顧八代兵部尚書索訥和吏部右侍郎傅臘塔禮部左

侍郎兼太常寺卿席爾達右侍郎多奇漢吏部尚書兼  
掌翰林院詹事府事張英兵部尚書杜臻刑部尚書翁  
叔元工部尚書李振裕吏部右侍郎兼翰林院學士彭  
孫適戶部右侍郎王士禎禮部右侍郎兼翰林院學士  
王封濬侍滿尚書庫勒納漢尚書張英講論語老者安  
之三句滿侍郎傅臘塔漢侍郎彭孫適講周易咸卦天  
地感而萬物化生聖人感人心而天下和平二句講畢  
賜宴太和門

山西巡撫僉都御史葉穆濟疏請旌表臨汾縣割股孝  
子賈從淮奉

旨割股不准旌表久有定例葉某并不詳查具題請旌  
嚴飭行



居易錄卷十九

欽定四庫全書

子部

居易錄卷二十一

詳校官侍讀臣陳崇本

員外郎臣牛勣文覆勘

總校官中書臣朱鈐

校對官中書臣方大川

謄錄監生臣范墉

欽定四庫全書

居易錄卷二十

刑部尚書王士禎撰

直隸巡撫副都御史郭世隆疏言宣府向設鎮道復設十衛六廳并各營并分理錢糧驛務然廳員限於佐貳營衛皆屬武弁予以臨民不特所用非其所長亦且政多扞格各衛既無漕運屯田之責以武弁而膺民社之寄徵糧之責與官制終有未協宜裁六廳七衛改設一府八縣庶文武均有職守軍民知所適從下九卿會議

如其所請奉

旨允行以宣府為宣化府倚郭為宣化縣西城衛為西  
寧縣萬全衛為萬全縣懷安衛為懷安縣蔚州衛為蔚  
縣懷來衛為懷來縣赤城堡為赤城縣龍門衛為龍門縣

兵部軍政

上命內閣傳

旨問九卿等各直省提鎮賢否衆首推甘肅提督孫思  
克湖廣提督徐治都頃之二提督與福建水師提督施



琅皆奉

溫旨褒嘉思克加振武將軍

上知人之明必孚衆論如此

命皇長子往祭西嶽之神以陝西連歲灾荒故也以四

月六日致祭仍

詔京官俱齋戒一日

禮部侍郎席爾達兵部侍郎珠都納從

萬壽節禮

臣請

御殿受朝賀奉

旨云斷不可行是日內閣暨九卿翰詹坊局諸臣赴

暢春苑進書畫祝

壽皆不納惟取古名人墨蹟入

御覽畢仍發出

門人陳庶常汝咸遺其鄉前輩王厚齋應麟文集寫本  
僅五卷明鄭真千之所輯厚齋宋末大儒常言今之習  
舉業者苟沽名譽得則一切委棄於典章制度漫不加  
省非國家所望於通儒乃假館閣書盡讀之所著深寧

居士集一百卷玉海二百卷通鑑地理考一百卷困學紀聞小學紺珠六經天文編詩考等又六百九十餘卷今多傳於世其集顧寥寥如此

元任士林句章集十卷萬厯中鄞人孫能傳鈔館閣藏本至正四年浙江行中書省舊刻也卷首有趙松雪撰誌銘王厚齋序士林字叔實與戴表元帥初齊名所作謝翱吳思齊二傳最傳程篁墩宋逸民錄載之他文或未稱是

倪雲林清閼閣集荆溪蹇朝陽所輯其八世孫理重刻  
而以世系冠編首則其裔孫某所為閱之噴飯按譜一  
世為漢御史大夫寬三世曰皓注官樞密院使鄭國公  
四世曰朋官監察御史拜中書令六世曰嗣祖官四鎮  
節度使八世曰承贊官叅知政事不知唐宋官名何以  
兩漢已有之至二十二世曰思注乾道進士蓋文節公  
也按文節六子祖仁祖義等而祖義祖常最賢譜乃云  
二子鮑鮒尤為不經且文節已為南宋人而譜在三十

二世濤始入宋三十四世允清慶歷四年應舉官至樞  
密使時代前後舛謬顛倒尤可駭笑似是一不識字人妄  
為杜撰而公然刻真集首異哉雲林二百年後乃有此辱  
東阿縣魚山陳思王墓道有隋碑書法雜用篆隸八分甚  
古今畧具可辨識者載於此王諱植字子建沛國譙人也  
洪源與九泉競深崇闕

比峻自植興闕

昌興

焉其後建國開基闕

周室顯霸業於東邾彰茅封於譙

邑瓊根寶葉蒔芳蘭以莫朽軒冕相傳襲縉紳而不絕此

乃備頒典冊聊可梗槩而言矣逮丞相廼成王室道勲  
隆重位登上宰受國平陽自茲厥後鳴鸞佩玉飛蓋交映  
祖嵩漢司隸太尉公執掌三事從容論道美著阿衡之任  
不亦宜乎父操魏太祖武皇帝資神龍虎剖判鬱以開基  
名頌識牒謠敵真人火運告終土德承厯援據圖錄享有  
天下驟改質文馳遷正朔英雄之氣蓋有餘矣昆丕魏高  
祖文皇帝紹即四海光澤五都負宸明堂朝宗萬國允文  
允武庶績咸熙正踐昇平時稱寧晏致黃龍表瑞驗兆漳

濱王虎金雞恒綸宇宙王乃閣內通理愠淑吟英殿哲稟

於自然博愍由於天縱佩金華以邁四氣抱玉操以忽風  
霜綴瞻藻於孩年攝酋什於孺歲尋聲制賦應詔題詩詞  
采昭灼于雲遙慙於吐鳳文華理富仲舒遠愧於懷龍又  
能誦萬卷於三冬觀千言於一見才比山藪思並江湖清  
辭茆茆若蘘荀之蔚鄧林綠藻妍妍如河英之照巨海武  
庫太官之饗握促之器者也但祿由德賞頻享皇爵建安  
十六年封平原侯十九年改封臨淄侯都不以貴任為懷

直置清雅自得常閑步文籍偃仰琴書朝覽百篇夕存吐  
握使高據擅名之士侍宴於西園振藻獨步之才陪遊於  
東閣黃初二年奸臣諂奏遂貶爵為安鄉侯三年晉立為  
王詣京師面陳濫謗之罪詔令復國自以懷正信而見疑  
抱利器而無用每懷怨慨頻啓奏四月改封東阿王五  
年以陳前四縣封後封為陳王以讒言數構奸臣內興十  
一年裏頻頻徙都汲汲無歡遂發憤而薨時年三十有一  
即營墓魚山傍羊茂臺平生遊陟有終焉之所既而年代



負遠兆瑩崩淪茂響英聲遠而不絕至十一世孫曹永洛  
等去熙朝皇建二年蒙前尊孝 皇帝恢弘古典敬立二  
王崇奉三恪永洛等於時膺符表貢面陳照皇親訓聖詔  
比經窮討時存實錄蒙敕報允興復靈廟饋嗣蒸嘗四時  
虔謁使恭恭嗣子得展來誠之願甄甄孝孫長畢昊天之  
慕遂雕鏤真容錫金寫狀庶使 闕 相度永劫而不泯七

步文宗傳芳猷於萬葉者也其詞 闕

粵維王

磐石斯固締緒攸長波連溟渤枝帶扶桑分珪作瑞建國

開疆蕙樓茵閣遠邁靈光

其一

器調高奇風革梳朗談人刮

舌靈蛇曜掌東閣晨開西園夜賞松華桂茂玉潤金響

其二

聲馳天下道冠生民才驚曠古德重千鈞混混不濁磨而

不磷如何一旦萎我哲人

其三

山舟易失日車難駐一謝人

間長遵堦路風哀松柏墳穿狐兔何世何年還成七步

其四

迺考惟昆廓定洪基受圖應厯運合紫微一辭皇闕永背

象闕聲隨日轉響逐雲飛

其五

大隋開皇十三年歲次皇

闕

之吉此碑文不極工考歐集古錄趙金石錄及近代金薤

琳琅石墨鵠華金石志俱不及載

嚴柱峯副憲

曾禁

家有金剛子念珠一串凡百四十顆色

如水晶大司農馬齊公出所藏僅十顆較大尤有光采  
云顆直百金也又示柴密稅一碧色形製甚古流光四  
射非哥定宣成諸密比亦尤物按格古要論云金剛子  
出安南六楞徧身花紋作數珠冬月不冷有龍眼大者  
榛子桐子大者愈小愈精須花紋深細

門人歙縣江閩赴解州守予以呂文簡公涇野所創解

梁書院及公祠堂屬修葺蓋文簡曾由翰林謫判此州也又同年子孟鈔子美知封丘縣有書來予答以唐高常侍忠公達夫常尉此縣往者給事中同年岳鎮九

峯秀

知縣事為建專祠請於上官春秋祀之當時加修葺俾勿廢墜名世先賢俎豆不衰所關人心風俗廉頑立懦者不小今之才有司或笑為迂濶不急之務然古之循良未有不加意於此者不知子美能用吾言否耳

春秋屬辭十五卷新安趙汾子常撰其義例有八一日

存策書之大體二曰倣筆削以行權三曰變文以示義  
四曰辨名實之際五曰謹華戎之辨六曰特筆以正名  
七曰因日月以明類八曰辭從主人宋文憲公濂序之  
吳仲圭晴江列岫圖一卷自題至正辛卯秋日梅道人  
寫有仲圭小印文休承弁州山人二印鄧文原題詩云  
長江亭亭桑落洲青山獨傲蘋花秋邊聲已逐鼓鼙盡  
水氣欲挾漁榔浮謫仙騎鯨五柳老真景變滅隨沙鷗  
空餘秦箏與羌管斷續不說琵琶愁梅花菴中解蒼珮

宴作得意毫端收空青點雲碧痕濕方諸取月寒光流  
江上老翁在何許似覺頷首相遲留佳峯稜稜鐵鉤鎖  
千樹點點同浮漚要知翰墨灑清氣俗子政爾勞雕鏤  
山空無人息機事青眼不與王公酬揮毫汗漫凜太古  
疑跨獨鶴遊磯頭人在江湖適意底用絕俗藏林丘  
披圖覽卷重太息天際杳靄疑歸舟又跋云蒲城孫世  
美編修與予同舟南下出嘉遜翁所藏梅道人晴江列  
岫卷相示筆意高古墨氣淋漓不在董巨之下因作長

句題之不能讚其八法之工也文原識下有巴西鄧氏  
善之印末有資善大夫南京吏部尚書魏驥仲房跋書  
法亦工

海天旭日圖一卷後有趙松雪書海賦前有唐李將軍  
海天旭日圖妙筆十一字書法極工有太原王達翰林  
學士李天祥天水趙鼎圭齋歐陽元題字又虞集八分  
書後云小李將軍筆絕無僅有得趙文敏公書海賦匹  
之可稱合璧楊文敏公跋云臣榮備職內閣恭逢聖治

休明禮樂隆盛澣沐之暇皇上御延英閣特召臣等出  
內庫書畫縱觀首得趙孟頫風圖御製長篇題之是  
日近侍翰苑諸臣俱有須齎臣榮蒙恩特賜茲卷海天  
旭日圖實為非常慶幸永作傳家之寶宣德七年壬子  
七月大學士臣楊榮虔沐謹誌

溪山漁釣一軸趙松雪畫故相國真定梁公家物也松  
雪自題詩云桑苧未成鴻漸隱丹青聊作虎頭癡久知  
圖畫非兒戲到處雲山是我師溪上先人之敝廬南山



秀色照庭除何時共買扁舟去看釣寒江縮項魚晉齋  
識見超卓久與僕客京師情因洽甚今晉翁先得歸鄉  
將與青山為主賓漁釣以自適僕情為之慙於其行畫  
此以寄意且為後會之故事云

老子青牛圖亦松雪作自題至大四年三月

新都秀運集二卷嘉靖間歙人王寅仲房所輯歙令門  
人靳治荆熊封重刻之意倣唐人中興間氣集惜成家  
者寥寥又雜出商賈之流無足觀者靳又嘗刻黃太冲

宗義黎洲集金陵鄭谷口簾頃寄其石柱看梅詩卷十  
絕句熊封又介予友曹員外升六貞吉寄其詩數百篇請  
予論次風流好事如此非俗吏也今遷知固原州

說范宋桓公愛公子目夷太子茲父請於公曰請使目  
夷立臣為之相兄以佐之相兄二字甚奇

內閣傳

諭翰詹衙門自讀講已下各錄詩賦進呈

御覽

為山問仰山作麼生是無異名底道理仰曰瓶盤釵釧  
卷孟益此句似栢梁詩體

胡釘鉸叅寶壽治禪師師問曰還釘得虛空否後叅趙  
州舉前話州曰祇這一縫尚不奈何胡於此有省州曰  
且釘這一縫釘鉸能詩又載禪林公案

象耳袁覺禪師嘗云東坡云我持此石歸袖中有東海  
山谷云惠崇烟雨蘆雁坐我瀟湘洞庭欲喚扁舟歸去  
傍人云是丹青此禪髓也予謂不惟坡谷唐人如王摩

詰孟浩然、劉春虛、王建、王昌齡諸人之詩，皆可語禪。

白楊順禪師偈：落林黃葉，水流去出谷。白雲風捲，回作文字觀。亦是妙句。

龍門世奇首座洞臻，玄與佛眼禪師命分座。師辭曰：此非細事。願生生居學地，而自煅煉。此語可愧後之上堂領衆者多矣。即吾儒佩為箴砭，亦何慮德不進、業不修乎？

宋兩張子野皆名先，一與歐陽文忠友，為孝章皇后戚。

里之姻官止知亳州鹿邑縣寶元二年年四十八卒文  
忠誌其墓云好學自力善筆札一與蘇文忠公為友公  
集中云昔自杭移高密陳令舉張子野皆從至松江夜  
半月出置酒垂虹亭上子野年八十五以歌詞聞天下  
作定風波令李公擇守吳興東坡過之會於碧瀾堂子  
野作六客詞坡詩所謂詩人老去鶯鶯在公子歸來燕  
燕忙詞家所謂張三影者是也官至都官郎中死葬吳  
興弁山有集一百卷今有張釣魚灣見掌故集胡應麟筆

叢云兩張先時字子野俱第進士其能詩壽考悉同一博  
州人號張三影者是也一吳興人胡欲考正而荒陋如此  
新安商某者萬厯壬午行賈江西過九江有舟被盜劫舟  
中人羣裸號泣問之七人時孝廉上公車者商賙之衣  
食贈之資斧泣謝而去明年七人中登進士者六其一則  
莆田方萬策也又數年方分巡嘉湖一日讌於屠冲陽  
副使家是時商以折閱不得已自鬻於屠方於衆僕中遙識  
之問曰爾新安商某姓曾遊江西乎對曰然曰猶憶八年前

在江川遇舟為盜劫者活若干人內有公車舉人七人  
賙給行李事乎商已忘前事良久乃對曰有之方亟出  
席長跪曰吾恩兄也相訪已數年不可得乃在是乎一  
座為之驚歎方即告於屠攜往署中留數月贈之千金  
又報同難者各致問遺商遂更為富人歸新安矣

明嘉靖四十一年太湖中有二龍一黃一白合股而行  
一青龍隨之由海鹽硤石東南入海四十二年海鹽午  
潮有海馬萬數其一大如樓房沿塘羣行二十餘里入

海聲如雷霆萬厯元年又有海鳥其大如舟翅如車輪  
自海南飛至翹首掉尾於波濤之上聲如風雨海水皆沸  
予少喜觀顏從喬僧世說未詳從喬出處觀皖志隱逸  
傳乃得其概從喬字若齡懷寧人京兆素子也性恬曠  
喜讀書尤耽釋典愛豹嶺林泉之勝遂卜居終身焉嘗  
作隱士詩以見志有集名種秫同時有倪爾朝方應賓  
二人者同隱冶塘山中與從喬為世外交倪贈詩云石  
門湖水隔溪碧豹嶺山月當牕明與君一別忽秋晏短



髮朝來白數莖皆明季高士也

阮濬字季子懷寧人築草堂於龍山冬夏惟披一衲因以自號性嗜酒工畫時攜襖被酒壺畫具命一僮肩之遊散山水間遇勝處輒流連忘返謂其友劉鴻儀曰死即葬我草堂之側磨片石題曰酒人阮一衲之墓未幾卒劉及同志葬之如約顏所居曰一衲菴每歲晏劉必攜酒澆其墓有詩弔之曰醉君君豈知去去復回顧一片紙錢灰飛上梅花樹濬詩多寒瘦畫格清絕入本朝乃卒亦高士云

崇禎十一年桐城縣郎氏婦人產二物一類西域胡一類象十二年汪氏婦人產一猿先是七年太湖縣雨黑泰民沈萬勲者取種之越歲成樹高二尺葉如枸杞終冬不枯但不花不實耳

國朝順治十五年望江又雨黑黍

嘉靖中石埭諸生章仁者通幻術與其黨謀不軌官軍圍之仁騰上樹杪就執之惟絳衣在焉仁已遁去後池郡李禎祥為瓊州通判其僕渡海遇颶風漂至交趾引

見其國相即仁也詢桑梓事甚悉遣人護送歸瓊州

汪夢栢貴池人崇禎中丞蜀之長壽縣以禦賊死妻亦死僅遺一幼女來姐僕余生夫婦偕居太學生周維魯家夢栢有甥吳雲者其長女之子也欲妻來姐來姐叱之曰我爾姨母也何得作此無禮雲慙且恚乃私許周為側室謀既成其父客徐鏡水者知之急聞來姐先是來姐襁褓中已受青陽老田吳氏之聘壻名國璋乃誓死剪髮付徐持告縣吳與周皆獲罪會長壽舊典史某

者饒州人與夢栢為僚友感其義迎來姐於家育為已女歸饒而令余生迎國璋於青陽合卺成禮久之乃同歸池州此一事也夢栢之烈女之節典史幕容之義三美具焉皆足書也

邢狗兒當塗布政使邢公珣之僕也珣守贛從王文成平宸濠之亂每履行陣狗兒以身翼之用雙刀直前搏戰所向披靡公卒狗兒溷跡市廛一日公夫人及諸子欲觀其能狗兒不可強之曰刀神物也不可褻必欲試

之須營一空室固其扁鐫空而窺之慎勿以身近也如其言頃之室中火光迸發如電影激射久之雪電彌空狂飈驟集杳不見人狗兒疾呼曰速擲雄雞來比雞入得血乃止蓋古劍俠之流云

方授字予留桐城人明末諸生工詩有鴻毛軒冕之意甲申聞李寇之變遂焚筆硯時同里世族多疾足以赴功名其父強之不可則撻之授逃之四明山中結茅而棲採橡栗而食間為詩得數百篇流傳人間時人以爲

真隱

侯珣亦桐城諸生博洽工文嘗衍蘓氏織錦迴文凡三言四言五六七言斜直方圓周旋出入得詩八百首又善投壺著壺譜奏矢一百四十法其友請試之置酒張壺按譜投之縱橫進退飛躍疾徐各臻其妙連日繼夜譜法纔盡其神解如此

國子監祭酒鄂拜吳苑等題為恭進

御製碑文以昭熙朝盛典事康熙二十八年閏三月准

翰林院移會內稱顏曾思孟贊詞已蒙

御製發出相應將四子贊詞并

孔子贊詞一併交與國子監勒石摹搨轉送禮部頒發  
各直省等因到監臣衙門隨於本年四月內有恭請  
御書勒石等事一疏奉

旨這贊字着翰林院書寫頒發欽此隨經翰林院書寫  
發到工部相地諏吉庀材鳩工建立碑亭礲石鐫刻今  
年三月工程告竣臣等將

御製碑文二道敬摹搨本裝潢成軸恭呈

睿覽伏惟

皇上德本生知聖由天縱

王言典重親觀德於橋門

帝學高深振淵源於洙泗羹牆可晤備論贊於先師華  
袞為榮兼頌揚乎四配彩亭聳峙兩楹之俎豆增輝麗  
石穹窿數仞之宮牆益峻洵斯文之隆過為千秋之鉅  
典也伏乞



皇上敕下禮部頒行直隸各省斯正學昌明天下之觀  
瞻允愜且譽髦蔚起諸生之誦法彌殷矣

禮部議得衍聖公孔毓圻疏稱

皇上鑒闕里廟貌隳敝特發內帑遣官監督修理我

皇上之曠典隆恩有逾前代而廟貌之輝煌壯麗度越  
曩時典既尊崇禮宜隆重特敢題請照例遣祭等語查  
明朝實錄弘治十七年

聖廟落成遣閣臣李東陽前往致祭我

皇上稽古右文崇儒重道治統立帝王之極心傳接洙泗之宗聖域鳩工特重專員之選良材庀具爰頒內府之金廟貌改觀几筵增麗規制倍隆於往昔楷模永著於來茲今當落成之時應遣大臣告祭恭候

命下之日其應行典禮再議具奏

碧玉露漿方於中秋前後用無五梧新青布一二疋扯作十餘段每段四五尺五更時於百草頭上

稻苗上佳

先用

細竹一根掠去草上蛛網乃用青布繫長竹上如旂樣

展取草露水絞在桶中展濕即絞視青布色淡則另換

新布陽光一見則不展所取露水用磁罐洗淨盛貯澄

數日自清晚間用男乳一酒杯兩半白蜂蜜一酒盞人參

湯一酒杯多少同乳人參須四五分總入一宮碗內將露水一

飯碗攪入宮碗共得七八分和勻以綿紙封口用碟蓋

好次日五更燒開水二大碗將宮碗內露隔湯盪熱睡

醒時緩緩溫服之蓋所以殺蟲露去諸經之火參補氣

乳補血蜜潤肺治一切虛損勞症有奇効

青州響水澗南有廣福寺寺有元魏武定二年齊郡太守劉明世造石像記隋文帝建舍利塔碑按趙德甫金石錄目錄有東魏劉起貴造像記東魏逢元彥造像記皆在武定二年獨此碑近在青州不知何以不錄隋碑乃孟弼書安邱張貞杞園云此碑雖佞佛祝釐之詞文頗雅馴字穠勁饒古意非篆非隸真八分也集古金石二錄及近世金薤琳琅石墨鐫華諸書俱未收恐遂湮沒故著之

朝中馳道自諸王已下無敢騎行者惟祭祀進呈祝版  
出天安門則太常卿騎從由馳道中行

寶泉局大使胡隆大嵩衛人其弟楨少習儒業妻于氏  
以康熙壬申病卒已殮未蓋棺而甦家人驚喜妻起坐  
張目周視久之曰非我家也何為至此家人環聽且駭  
問之則操粵音曰我張氏東粵人也嫁濟南王家昨病  
卧牀簀間夢至一官府有王者閱文書云張氏未合至  
此可送還即有二卒引出四望幽暗唯中間有路如白

晝然數聞暗中有絲竹聲意欲佇聽之卒曰可速行彼輪迴六道不可往唯此路可達人間耳送至此二卒遂不見今此何地吾夫家眷屬時安在衆語之故泣涕求還衆不可曰若魂魄雖異形體則于氏也豈得歸他人家力勸與楨重合數日始從張氏知書通制舉業每楨作文輒就之評騭楨應童子試歸閱其文輒不許曰君宜改名梅即售如其言再試乃許之曰君必得雋矣名且在第二已而果然王人岳陽大司農述之甚悉云

予昔與故友葉文敏

方謫

論牛李君子小人之辨語見前

卷適讀崔鷗德符論楊嗣復備言小人常勝君子常不  
勝其大端有十二而終之曰君子小人之不敵亦明矣  
此鄭覃陳夷行所以罷黜李德裕所以謫死窮荒李逢  
吉宗閔楊嗣復輩所以卒於翔祥而得志豈足怪哉崑  
山王志堅弱生跋曰李贊皇之相業唐季無兩弇州以  
比裴晉公而稍昂之其論當矣至其為人論者猶或不  
滿以為不能釋憾解仇亦不盡然也仇士良以武宗之

立非宰相意勸帝誅楊嗣復李珣戶書杜悰見德裕救  
之三人者皆牛黨也使以私怨行之立鑿粉耳乃與同  
列上奏至於伏地不起楊李得全僧孺二李能之乎二  
李之惡極矣貶之未可謂私白敏中令狐綯皆二李黨  
贊皇引用不疑而卒受其禍憾自不釋仇自不解耳非  
贊皇之過也晁无咎詠贊皇云當年伏地全楊李公亦  
何知愛惡間云云亦同此意弱生著史商詳載此議觀三  
公之論則知蘓黃門牛李論之諄而予前說之非臆矣



恨不能起亡友於地下而質之也

予讀唐庚集嘗薄其為人其說亦著之前卷王弱生曰  
唐子西議論文章皆蘓氏緒論顧以黨禁方嚴而子西  
又附張商英以進其著作多不及蘓氏止題巢元修傳  
及之大致譏貶上蔡司空書論當世文學之士止言尹  
師魯王深甫其趨時也如此然亦何救於貶謫哉此論  
亦與予言若合符節所謂三代直道也

予嘗薄張浚之為人有題其墨蹟一詩并載江盈科進之

詩於前卷頃又見王弱生讀宋史張浚傳二絕句云一  
立彤墀喙便長有時鮑老也當場富平未起符離又可  
悔彈文到李綱十萬良家等蟻蠊符離一夕水流紅魏  
公心法由來異鼻息如雷學寇公此詩尤先得我心之  
同然者

戶部同官

予以康熙三十一年八月自  
兵部督捕侍郎調戶部侍郎

戶部尚書王公隲

順治乙未進士同  
年山東福山人

戶部左侍郎蔣公宏道

順治己亥進士山西臨  
汾人官至左都御史

夜暗歸雲遠  
舵牙一首乃宋姜夔堯章詩見白石集列  
朝詩收之作張如蘭詩誤矣

楊夢山先生

魏明史書

五言古詩清真簡遠陶韋嫡派也五

律尤高雅沉澹予嘗選評其集刻之別本所取非其至  
者而又云李中麓諸人咸推之楊李詩格相去霄壤顧  
反引李以為楊重耶大抵持此論者意在訾史詩之去  
取殊草草不足為典要讀者當分別觀之勿為盛名所  
怵乃善耳

平臺在太液池西隄兔園東北中有團頂小殿本武宗所築閱射之地又後左門左翼室亦曰平臺今

上曾召見內閣於內賜詩右馬文簡公汝驤西苑詩云然後左門平臺自康熙初為內閣直房今內閣仍移午門之內內三院每九卿五鼓奏事皆候於平臺

駕出御乾清門乃入

以今揆之當是中左門耳

五月士禎蒙

恩授階通議大夫祖考布政府君考祭酒府君俱贈通

議大夫經筵講官戶部右侍郎祖妣成氏張氏妣孫氏

俱贈  
恭人

妻張氏

前贈  
恭人

今俱贈淑人先祖年及大耋教諸孫

相繼成進士先考妣教諸子雖稍寬假然以布政公之  
故督課殊切迴憶庭訓四十年矣至是乃稍食其報感  
激

國恩不禁泣然吾子孫輩當知之

居易錄卷二十

欽定四庫全書

居易錄卷二十一

刑部尚書王士禎撰

謝鎮西妾阿妃有國色甚善吹笛謝亡阿妃誓不嫁比  
中郎將郝曇以計得之阿妃終身不與曇言此與息夫  
人極相似王右丞息媯怨云看花滿眼淚不共楚王言  
意尚含蓄吾鄉孫文定公泚亭廷銓詠息夫人詩云無言  
空有恨兒女聚成行讀之輒失笑以贈阿妃不知當作  
何對也

錢氏力攻空同其稍能與空同異者則亟進之至云空同就醫京口吳中人士皆絕弗與通又言高郵王磐口占詠老人燈詩面譏空同尤非事實當時空同文章氣節震動天下王磐何人敢爾無禮且空同劾壽寧侯劾劉瑾名榜朝堂號為黨魁即不以詩名世已仰之如泰山北斗乃絕弗與通如避豺虎蝮蛇然何為者耶錢氏尊一學張禹孔光之西涯強擬東坡賤一能為汲黯之空同曲加文致以此修史其顛倒是非必矣

按此亦斥諷  
並語故存之



初三日皇長子奉

命告祭

孝陵以

聖躬初豫也

禮部尚書顧八代從

前監察御史陸隴其卒隴其字稼書浙江平湖人康熙  
庚戌進士隴其以御史罷歸潛心理學授徒常熟逼歲  
除乃返抵家頃之卒年六十三壬申冬十二月二十八  
日也

姜南鹽車道馳云國初庶吉士或在中書省或在文華堂後乃改置翰林梁用之作徐孟昭傳云孟昭登洪武乙丑進士第行浙江道監察御史入為禮科庶吉士日記事侍上左右然則洪武中六科亦有庶吉士矣

宋程卓使金錄云十八日早頃藥城縣蘇黃門轍墓尚存縣治之側按潁濱自嶺外歸老許州葬郊縣小菽眉與長公同兆域藥城安得有墓按歐陽公銘老泉墓云蘇顯唐世實藥城人以宦留眉蕃蕃子孫潁濱文集號

藥城示不忘本也

初九日

命宗室公福善內大臣舅舅佟國維內大臣明珠吏部

尚書庫勒納以

上體初豫告祭

天

地

宗廟社稷

予生平喜竹所居輒種之順治庚子辛丑間任揚州府  
推官於猷事廳前後皆種竹爰書之暇輒嘯詠其下廳  
後故有小亭可置牀几倦即偃息其中自賦一詞題壁  
上偶未編入行波詞今錄於左云手種牆南千箇竹春  
雨瀟瀟拔地參天綠斫取杉皮新縛屋直須傲煞簣簞  
谷解道難醫惟有俗試問旁人無竹何如肉未必禪  
心超忍辱且從玉版參尊宿存之亦可追想少年高邁  
之氣不為卑冗縛束如此

庚午歲聞周石公

之麟

僉都述鄒魯害御史何瞻瞻子兢

報父讎事遂筆之第二卷中適讀杭人姜南明叔蓉塘  
詩話乃知瞻亦小人耳姜云弘治初浙江巡按御史暢  
亨劾鎮守太監張慶不法事慶亦誣亨以他事具奏草  
則出於致仕御史蕭山何瞻舜賓之手也後何卒為知  
縣鄒魯殛死人皆冤之而不知其得罪名教不足惜也  
故知人論世不可草草

四川提督總兵官吳英說昔得秘方治撲打跌損傷極

效雖重傷瀕死但一絲未絕灌下立甦往在福建為副將時軍中有二弁相鬪皆重傷其一則死矣吳聞馳往視之惟心頭氣尚微暖亟命以藥灌入覺胸間喀喀有聲不移時張目索食翌日遂能起行自後屢著神效云其方以十一月采野菊花連枝葉陰乾用時每野菊花一兩加童便無灰好酒各一碗同煎熱服

又一方未退胎毛小雞一隻和骨生搗如泥作餅入五加皮傳傷處接骨如神

宋古文始於柳開穆修鄭條三人柳穆今有集人多知之條蘓州人天聖八年王拱辰榜第三甲進士咸平三年陳堯咨榜進士為之子也兄修景祐三年王整榜進士及第見姑蘓科第表

宋鄭虎臣殺賈似道者吳人也其家居第甚盛號鄭半州四時飲饌各有品目自著集珍日用一卷元夕閨燈實錄一卷亦見姑蘓志

李侍郎厚菴

光地

言聞兵部尚書索諾和公說用未熟青

黃色大柿一枚好酒煎至九沸去酒取柿食之治失血  
症神效

張寶菴

璽

妹婿知新野縣寄李文達公賢古穰文集寫

本三十卷天順日錄古穰雜錄皆在集中予按篁墩集  
云古穰集三十卷走所編者梓行已久公子尚寶卿士  
欽弟錦衣千戶士敬菟其家藏與得之四方者復畀走  
詮次為續集定為二十卷如右此蓋前集也篁墩撰公  
行狀又云有和陶詩二卷和杜詩一卷讀易記讀詩記



各一卷南陽李氏族譜若干卷體驗錄一卷今本皆無之大抵公之得君與李文饒相似才畧相業亦畧相當然公遇石亨曹吉祥而不死以功名終文饒晚遭貶竄竟死太牢之黨則命也

鍾退谷惺論高岑云唐人如沈宋王孟李杜錢劉雖兩人並稱皆有不能強同處惟高岑心手如出一人此語謬矣所舉數家惟李杜門庭判然其他皆不甚相遠推而至於元白張王溫李皮陸之流莫不皆然獨高岑迥

不相似五言古則高古樸岑靈秀七言古則高雄渾多  
正調岑奇峭多變調強同之不已疎乎

近日金陵有刻唐詩十集者謂為予所訂或作序假為  
予言云予奉此為金科玉律年來於此道稍有會者得  
力於是書良多云云不勝駭異及訪是集閱之乃標華  
亭唐汝詢仲言名大旨在通高漫士李滄溟鍾退谷三  
選之郵而以汝詢詩解附之強分甲乙丙丁等目淺陋  
割裂可一笑也門人盛侍御珍示方為予較刻唐詩

十種選集集名適同慮其亂真且悞後學當寄書使正之

唐五言詩開元天寶間大匠同時並出王右丞而下如孟浩然王昌齡岑參常建劉春虛李頎蔡母潛祖詠盧象陶翰之數公者皆與摩詰相頡頏獨儲光羲詩多龍虎鉛汞之氣田園樵牧諸篇又迂闊不切事情而古今稱儲王何也高適質樸不免笨伯杜甫沉鬱多出變調李白韋應物超然復古然李詩有古調有唐調要須分

別觀之

盛唐諸公五言之妙多本阮籍郭璞陶潛謝靈運謝朓  
江淹何遜邊塞之作則出鮑照吳筠也唐人於六朝率  
攬其菁華汰其蕪蔓可為學古者之法

七言古詩諸公一調唯杜甫橫絕古今同時大匠無  
敢抗行李白岑參二家別出機杼語羞雷同亦稱奇  
特

杜常北宋人其過華清宮詩云行盡江南數十程曉風

殘月入華清朝元閣上西風急都入長楊作雨聲今唐詩多誤收之又荆叔漢關山河在一首不知何代人僅見石刻今亦收入唐詩

六月大雷震電石安門萬壽宮側雷擊一人震死者三人皆屠戶耳

吾鄉沂州有土瑪瑙紅多細潤者佳胡桃紋者最貴亦有大雲頭花及纏絲者次之紅白麤花者又次之大者至五六尺性堅用砂鋸開板嵌桌面胡牀屏風之類又

名錦屏瑪瑙石見格古要論雲林石譜云峽州宜都縣有瑪瑙石紋理旋繞如絲間有人物鳥獸雲氣之形泗州盱眙縣寶積山與招信縣皆產瑪瑙石宣和間招信令獲一石大如升其質甚白中有黃龍屈盤之狀貢入內府又云黃龍府山中產栢子瑪瑙石色瑩白上生栢枝或青或黃白蒙亨使北主遺一石大如桃上有鸛鵲如豆許棲栢枝上頗奇密州安丘縣瑪瑙石產土中水際色瑩白紋如刷絲盤繞石面成諸佛像汝州瑪瑙

石色多青白粉紅瑩徹有紋理如刷絲石皆石之似瑪瑙者然漿水瑪瑙淡紅者內有花紋如栢枝亦謂之栢枝瑪瑙瑪瑙出北方及南蕃西蕃非石非玉堅而且脆有人物鳥獸形者最貴有錦紅合子截子纏絲等名次淡水紅者曰漿水紫紅者曰醬斑有海蜃色者兔面花者皆見要論

王文恪鑿姑蘇志方技載席謙善碁下引杜詩云席謙不見近彈碁是亦謬彈碁為奕也何怪今人沿襲之

謬

莊子漁父篇所謂四患者好經大事變更易常謂之叨  
專知善事侵人自用謂之貪見過不更聞諫愈甚謂之  
狠人同於已則可不同於已雖善不善謂之矜右數語  
王安石贊也予以為更勝老泉辯姦論

睢州田蘭芳梁紫寄予所著文集梁紫與商邱劉榛山  
蔚同里同起侯方域朝宗之後為古文有聲梁宋間今  
劉死田老於諸生皆宋收仲中丞友也



宋牧仲撫江西一夜夢予屬賦瀟湘雁立成五言覺而憶之不遺一字詩云岸澗水無際月明春雁翔徘徊念儔侶清影落瀟湘時康熙壬申四月十九日也

李煒字振雅長垣人萬厯甲辰進士好道術蓄一不灰木火爐爐中香烟自起則吕仙降其室與寤言中夜惟一小僮聞之餘人不聞也官青州知府府署後有園前守遊者輒病恒扁鐫之煒入園周視曰無他異唯荷池中瘞萬金此為祟耳其二子請發之煒曰金

鎬柴寅賓名字吾何可妄取乃復扁其門加封識焉  
柴寅賓者亦長垣人時方成進士知某縣也一日坐  
公堂忽對城南雲門山咄咄久之呼兩隸前曰南山  
某處有兩狼厄一擔夫並往救緩無及矣隸馳往至  
南門外過一伎館索茶煇坐堂上忽發怒曰吾戒諭  
嚴切乃淹留伎館耶即遣急足偵之果在為述守言  
乃大驚急同至南山下則一擔夫與兩狼相持力盡  
幾斃矣遂協力殪一狼擔夫得脫其神異往往類此

在郡無疾一日忽召二子曰呂仙召我我將逝矣遂卒年甫五十二後十餘年柴寅賓果守青州發池獲藏金萬富甲邑中柴歿其子不能守竟敗落李族孫丙辰進士聘說

六月二十五日滿漢大學士滿尚書都御史漢禮部尚書張英

賜遊暢春苑泛舟

賜肴饌既而

賜大學士王熙以

御書長春宮頌及滿尚書人

御書扇一先數日張蒙

賜扇

御書唐詩忽見寒梅樹花開漢水濱不知春色早疑是  
美珠人其背面畫梅一枝左都御史沙海得登登山路  
行將盡一首

諸公言在

暢春苑見外國所貢玻璃瓶二一貯水去其蓋覆即有烟  
自水中出夜有火燄一水中貯小木一段鈎出別以木拭  
之可以取火士禎按拾遺記西海有浮玉山山下有穴穴  
中有水其色如火波濤灌蕩其光不滅晝則通朧不明夜  
則照耀穴外是謂陰火木華海賦所云陰火潛然是也太  
平寰宇記曰不灰木俗多為鋋子燒之成炭而不灰出膠  
州其葉如蒲齊地記曰盧水側有勝火木方俗音曰檀子  
即東方朔神異經不灰一作之木也又徐無山有不灰之木

色黑似炭而無葉有赤石磨之則火發以然不灰之木  
可以終日郎瑛自言得不灰之木須石腦油塗之始然  
右見升菴新語及方氏通雅又關尹子曰兩木摩火生

麥粉不拘多少用陳醋熬膏貼無名腫毒神效

寧都令  
李聘說

李中麓太常云如楊慈湖之易林之奇之書詩則王氏  
總聞春秋則本訥經筵及魏湜之禮記集說多有高出  
朱註之上者此外能發明經旨者抑又不止四五十家  
宋刻已古鈔冊漸訛再過百年俱失傳矣必須題請之

後有京板以及各書坊有鏤板始可通行天下不然則以拘拘背朱為嫌而經術不幸不滅秦火矣又有與霍渭厓書云解詩者無論漢唐宋儒如王氏總聞歐陽本義李黃集解錢氏詩說嚴粲詩輯呂東萊讀詩記有高出朱上者有互相發明者古人於詩之山水制度魚蟲草木詳為之釋而意則欲得之言外故夫虛心活法斷章取義者讀詩之大約也譬諸聞人之言而又轉述於人已不能無訛乃又強定一主意是豈逆志之道哉詩

之柄者詩之病也不小序而詩柄焉此世儒之拘見也  
中麓遽於經學其言如此

萊陽姜如農埰如須垓兄弟齊名時稱二姜如農崇禎  
末為給事中建言謫戍宣城衛昂革後兄弟遂卜居吳  
郡不歸鄉里給事死遺命葬宣城以謂故君未賜環不  
敢首邱吾友張杞園貞作祠記書其事南北名士多歌  
詠之既而遷其夫人之匱合葬於宣而葬給事之衣冠  
於父母墓左予謂非禮也夫給事身值滄桑居吳不返



或歲一歸省墓或數年一歸省墓猶可也死不首邱又不歸骨先壟顧遠葬他所此則矯激好名之過而害天性之恩可已而不已者也至遷其夫人遠祔江南而以衣冠代歸葬此尤非也已不歸葬已無以慰父母之望於地下乃并其婦已葬之骸骨大去其鄉明其與父母絕矣孝子忍乎哉是何其於君臣之義厚而於父子之恩薄也禮曰鳥獸失羣匹越月踰時則必反巡過其故鄉回翔焉鳴號焉踣躅焉跼蹐焉然後乃能去之

而況人乎況父母之墳墓乎予讀思穎詩每致憾於歐陽永叔茲給事之葬亦未敢傳會以為然聊書杞園記後以質諸知禮者云

牛僧孺以詩謁劉夢得夢得為飛筆點竄僧孺深憾之至作相後纔吐劉愧悔以戒子孫故王建云人怪考詩嚴予生平手定朋友之詩多矣率從直諒諒之者固多抑豈必無怪其嚴者昔為郎中時嘗為戶侍魏敏果公象閱其集魏以手札報謝云于論文談藝之中見吾心

不欺之學魏講學故云云然不欺二字實談藝根柢耳

杜詩公孫大娘弟子舞劍器行序云開元五載余尚童  
穉記於郾城觀公孫氏舞劍器渾脫劉瀛頓挫獨出冠  
時按陳陽樂書云樂府諸曲自古不用犯聲唐自則天  
末年劍器入渾脫為犯聲之始劍器宮調渾脫商調以  
臣犯君故為犯聲又唐多解曲如柘枝用渾脫解之類  
觀此則劍器渾脫自各為舞曲之名今人誤讀杜詩序  
以劍器為句而以渾脫劉瀛頓挫六字為句以為皆柘

贊舞劍器之妙謬沿襲文字中往往以渾脫瀏漓四字連綴用之可笑也

唐王義方彈李義府曰昔事馬周分桃見寵後交劉洎割袖承恩義府固姦邪乃出身如此又小人輩所羞道梅聖俞宣州雜詩有云一過響山畔常思路中丞中丞之中亦作竹仲切僅見於此

王弼州朝野異聞錄載何心隱事甚詳其畧云心隱才高於顏山農而狠幻勝之有吕光午者力敵萬夫相與

為死友嘗遊吳興幾誘其豪為不軌又與一富室子善  
偕之數百里外忽曰天下唯子能殺我我且先殺汝紕  
之湖中而挾使手書取其家數百金而後縱之善御史  
耿定向遊京師與處而故相張江陵來訪既去忽謂定  
向曰此人當殺我吕光午又數遊蠻中以兵法教其酋  
長事稍稍聞江陵屬江西湖廣撫按密捕之得之於嶺  
北見撫臣王先曾祖諱之垣不肯跪曰若安能殺我殺我者張居  
正也擇健卒痛笞之百餘乾笑而已遂死獄中心隱之

本末如此予小時於家故籍中見先曾王父大司徒公

撫楚時所刊大姦何心隱即梁夫山

幾名不一此其一耳

招案惜不

存矣而萬厯疏鈔乃載南給事中趙崇善劾曾王父一

疏中以殺心隱為罪而曲護心隱謂公欲壻江陵而枉

殺之其言比於狂吠愚當痛心疾首於此因讀弇州所

記心隱惡蹟與當日爰書昭合遂手錄之史館諸公自

有公議非崇善一人之私言可亂千古之白黑者也

延綏鎮新誌花木類有後姚婆一莖作蓓蕾開花五六

辦翠色俗云舜母亦曰虞美人因虞字而傳會殊謬按  
虞美人即鶯粟花俗名米囊有千瓣五色人名滿園春  
通雅曰虞美人有吳蜀二種碧雞雜志言桑景舒作虞  
美人曲而此花輒動先王父方伯公羣芳譜云虞美人  
草獨莖三葉葉如決明一葉在莖之端兩葉在莖之半相  
對人或歌虞美人曲則葉動如舞又名舞草出雅州宋  
曾慥詩芳心寂寞寄寒枝舊曲聞來似斂眉哀怨裴回  
愁不語恰如初聽楚歌時今詩餘調有虞美人古今通

詠虞姬事舜母之名妄矣

通雅舊音謂之勃又為葭北人謂之孤薄音如孤都即宋景文

所云肱肱今山東方言尚云孤都也

惠顯字晦我清澗人東林黨人世揚同產弟也少為諸生去而從軍積功至延綏副將李自成寇榆林顯激厲將士勉以忠義城陷賊說降且曰若世揚弟能從我當為權將軍顯極口罵賊賊怒磔之顯初名顯揚恥兄世揚降賊故更名云世揚子漸字碩亭為撫邊守備亦罵賊死獨世揚降賊受偽官



來順威武堡應襲傳鏜僕也主母病亟順泣曰主母如此我受撫育猶子也報恩在斯時矣自割臂肉煎進之病尋愈王覺明靈壁人從其主謝成夫婦成綏德州幼子鏞在襁褓道棄之覺明適前行既問知其故痛哭返求之得於草間乃籠負而行後成無他出賴鏞不絕右二義僕事見譚吉璉延綏鎮志皆明時人

一產三男本朝五十年来直省每歲屢告殊不以為異戶禮二部會題止行有司給米布而已然南唐時真州

民一產三男皆封將軍之號則侈為非常祥瑞矣古今事不同有如此

涓來少宗伯說劉修撰克猷

壯子

中明崇禎庚午舉人困

於公車至順治己丑赴會試初入京居黃岡會館是夜夢一神人自空而下類人間所繪畫魁星者連呼狀元劉鷺起遜謝顧曰數定矣何遜謝為是科遂捷南宮殿試果及第第一既入翰林又一夕夢人告曰君雖狀元及第然官不過五品年不過五十時遇

覃恩加一級為從五品急請告歸未久病卒年四十三卒時命家人開牕仰視曰天樂迎我我逝矣又曰我東華真君第三弟子今召復故位耳劉生平力行功過格制行不減古人七月十三日漢人九卿卿寺赴

暢春園起居有

旨入見於澹寧居

澹寧居在苑東偏南向僅三楹製極樸素

棲霞竺菴禪師名大成覺浪盛公弟子也有和寒山詩云我著弊垢衣衆人生譏誚我著珍御衣衆人稱切要

我著毛羽衣衆人皆大笑若我不著衣何人知我妙又  
白鶴欲升天黃鶴不相許飛入鸚鵡洲求食洞庭渚千  
年後千年雙雙變毛羽兩兩竟成仙誰向凡人語

康熙壬子十月攝山僧旭初者誘少婦入山藏於中峯  
之麓將狎之忽見一金甲神人身高數丈推大石懸空  
而下旭驚走其婦已齏粉矣旭病年餘始愈

僧天花者山東人不持戒律酗酒亡賴人皆惡之遊方  
至河西務居焉而飲酒食肉如故久之人頗厭苦天花

一日大市牛酒召鄰里畢集酒酣諭衆曰吾行脚至此  
久溷諸檀越今將行矣聊此言別犇飲至夜半起曰吾  
明早乃行居士輩留此勿歸須送我乃返耳衆疑其所  
為去留各半比天曉索湯沐浴拜佛竟呼衆曰居士珍  
重吾行矣入室敷坐而化

予昔讀三原王端毅公逸事愛其詩著之池北偶談單  
縣族姪溥適貽秦襄毅公絃年譜公事功氣節卓然為  
成弘間名臣詳在國史昔亦載於偶談獨其詩人無知

者畧識於此以南道御史謫沅陵北客驛驛丞寄南臺  
諸僚友云幾磴烟村傍水涯驛亭喜得遠繁華閑穿洞  
口尋鍾乳悶向江頭看蓼花葛粉熟時堪代飯釣船到  
處即為家深源

作洪  
喬誤

賢矣非知命咄咄書空祇自嗟以

戶部侍郎忤萬安謫廣西叅政述懷云休嗟飄泊在天  
邊且趁時光度眼前地勝那同凡世界官閑真是散神  
仙春嫌花鳥牽吟興曉厭松風聒醉眠疎懶竟能成底  
事幾回猶夢聽朝鞭以南京戶部尚書致政居谷亭述

懷云許國何嘗敢愛身鐵衣重整幾番新羞貪棧豆甘  
求退怕累兒孫願受貧賜玦三為嚴譴客沉湘兩度再  
生人祇今留得形骸在薄暮纔臨蔗境春

秦襄毅公生時母朱夫人夢天大雷雨有二物蜿蜒攀  
牕內窺頭角如麟目光如電驚寤而公生年十七讀書  
學宮夜夢神人衣冠甚偉飲以盃水水面光浮星月自  
是文思日進景泰元年公車過德州夢一龍自深淵奮  
躍而起公攀龍角騎項而飛明年登進士第

秦襄毅公自言平生居官事神務極誠潔行事惟任理  
不任情治民惟用絜矩二字御史惟用易大畜豮豕之  
牙一爻刑罰一以欽恤為主

爾雅豬大防則豬是隄防  
之義豬其牙謂防止其牙

秦襄毅公以右都御史總督兩廣軍務公弟南太僕卿  
崇寄書云聞兩廣事繁自都指揮以下得專生殺權重  
如此在兄處之必其有道公答書曰事繁當以無事處  
之權重當以無權處之如是而已

大學士兼吏部尚書李天馥赴



暢春園謝

恩回籍守制

溫旨慰勞天馥因為母

誥封一品太夫人瞿恭請

御筆亦蒙

俞旨頒賜天馥因奏前恭遇

萬壽節所進書畫等未蒙俯納不敢帶回仍祈

俞旨收入內府有

旨止留劉松年溪亭圖一軸黃庭堅書江安詩一卷范寬  
江雪漁歸圖一卷趙孟頫書福仙院記一冊文徵明泥金楷  
書一冊董其昌書酒德頌一卷澄泥井田硯一方皆異數也  
廣陵所刻唐詩七言律神韻集是予三十年前在揚州  
啓涑兄弟初入家塾暇日偶摘取唐律絕句五七言授  
之者頗約而精如舉冒丹書青若見而好之手鈔七律  
一卷攜歸其後二十年泰州繆肇申黃泰來刻之非完  
書也集中有陳太史其年及二子增入數十篇亦非本

來面目矣

僧寶傳石門聰禪師謂達觀曇穎禪師曰此事如人學書點畫可效者工否者拙何以故未忘法耳如有法執故自為斷續當筆忘手手忘心乃可此道人語亦吾輩作詩文真訣

佛印元禪師謂衆曰昔雲門說法如雲雨絕不喜人記錄其語見即罵曰汝口不用反記吾語異時裨販我去學者漁獵語言文字正如吹網欲滿非愚即狂吾輩作

詩文最忌裨販所謂汝口不用反記吾語者也

上命內閣學士戴通賚

御書賜大學士李天馥母瞿曰貞松堂上方有璽曰康熙

御筆之寶又

賜天馥

御書一卷曰儒者當學探本原行迪醇茂循序進德守

已冲虛一言一動罔有不謹嘉謨嘉猷必以入告斯廣

譽翁聞而為周行之士也凡四十七字末書癸酉倣松

雪道人筆意卷首璽亦用康熙

御筆之寶

五祖演禪師綿州人造白雲端端謂曰川藟苴汝來耶  
又明覺顯禪師與棲賢謁禪師藟苴不合按字書云藟  
力瓦切藟蘼泥不熟貌郭一經曰出安子文贊苴又側  
下切音鮓土苴查滓也糞草糟粕之類蓋謂其但講教  
典未經蘊韜所得尚糟粕也今山東謂物之不磨磬滑  
潤者及人性情乖角不平易者皆有此稱其來古矣

今語謂皮衣之長者曰褡褳此語最古郭一經曰半臂衫也起於隋時內官服之

執金吾金吾鳥名古今注云金吾棒也以銅為之黃金

塗兩末謂為金吾二說不同

段干段干蓋以地為

氏

居易錄卷二十一